

Pressiteedüs 28. mai 2016

Täämbä om võrokõisi suur laulupido Uma Pido

Täna, 28. mail om Põlvan Indsikurmu laululava pääl neläs Uma Pido. Võrokeelisel laulu- ja rahvapidol tundas rõõmu umast vägeväst kultuuriperändüest ja ummamuudu ilmakaemisõst. Pido sääd lava pääle Põlvast peri näütlejä ja lavastaja Kristo Toots ja pido kõnõlõs mõtsast ja väeliidsist puiõst.

Uma Pido projektijuht Triinu Laan om kimmäs, et Uma Pido pääkontsõrt lätt henge: “Pido kõrraldamisõ perämäne päiv om olnu täüs hääd ütentiütämist ja Indsikurmun oll’ pido hõngu tunda jo päiv varrampa, ku ilostusõ’ olli’ vällä pant ja miiskund andsõ pidolõ perämäst lihvi. Minno tege rõõmsas ka tuu, et rahvalaulu tii pidolõ nii häste vällä sattõ ja et taa tii lõppi tähendusligult Põlva kihlkunnan, kon täämbä õdagu om ka Uma Pido.”

Pido pääkontsõrdil mäng pilli, laul ja tands kokko 3438 inemist. Laudas 26 võrokeelist laulu, minkast 21 omma’ valmis saanu õkva seo Uma Pido jaos. Kokko om püüne pääl lauljit – latsi, naisi ja mihi – 3344, pidolõ om hinnäst kirja pandnu 154 laulukuuri.

Lauljit saat Uma Pido orkestri, midä juhatas Riivo Jõgi. Iist laulva ja pido luu jutustasõ’ Meelika Hainsoo ja Kulno Malva. Vahepalakõisi kand ette ka Ülle Podekrati folklooriansambli Käokiräs ja tandsva’ Kagu Kabujalakõsõ’ ja Mandariini’. Pido tandsu’ teivä’ Aveli Asber ja Andre Laine.

Pido kunstnik om Põlva kunstikooli direktri Anne Prangel, kiä muu kujondusõ siän tarvitas ka 10 suurt trummi, mink pääle om maalit Vana-Võromaa kihlkundõ ja sõpru märkvä’ puu’. Indsikurmu tege kiriväs ka kilomiitre jago vereväst kangast pailu.

Inne pääkontsõrti om Põlva liina staadioni pääl uma kraami laat käsitüütari ja laadulavaga. Laadulava pääl astva’ üles latsõ’ Põlva ja Võro maakunnast, päält näide viil tunnõt ülesastja’ nigu lõõtsamiis Heino Tartes ja duo Aapo Ilves – Marju Varblane. Esierälidse’ omma’ ka VanaVõromaa rahvarõividõ demonstratsiooni’ laadulava pääl. Laat nakkas pääle joba hummogu kell 8 ja saa läbi kell 15 päälelõunal.

Kell 17, tunn inne pääkontsõrti, kotonõsõ’ võro keelepesarühmi latsiaialatsõ’, oppaja’ ja latsõvanõmba’ ja inne pito katõ kuu joosul eri paigun lauluõdagit pidänü rahvalaulja’ Jakob Hurda mälehtüssamba mano, et minnä’ ütenkuun väiku rongikäügiga pidolõ ja läütä’ pidotuli. Pääkontsõrt nakkas pääle kell 18.

Pääle kontsõrti tulõ simman ansambliga Toomas-Henrik, kon mängvä’ tunnõt rahvamuusigu’ Toomas Ojasaar, Henrik Hinrikus ja Meelis Int.

Võrokeelist rahva- ja laulupito peetäs 2008. aastagast pääle. Pido käü küläkõrda katõ VanaVõromaa suurõmba keskusõ vaihõl. Edimene pido peeti Võrol Kubija lauluvälä pääl, tõõnõ pido oll aastagal 2010 Põlvan Indsikurmun, kolmas pido 2013. aastagal jälleki Võrol Kubijal ja timahavanõ pido jõud vahtsõst Põlvahe.

Inämb teedüst saa pido kotsilõ kodolehe päält: www.umapido.ee

Ligemb teedüs:
Triinu Laan

Uma Pido projektijuht
Võro Selts VKKF
tel 533 22 153
triinu.laan@wi.ee

Uma Pido koduleht: www.umapido.ee

Uma Pido blogi: <http://umapido.wordpress.com>

Uma Pido Facebookis: <https://www.facebook.com/UmaPido-278039651663/>